

ՀԻՆ ՃԱՊՈՆ

Մի քանի վայրկեանից յետոյ մտնելու էինք սրբազան Կիօտօն, Ճապոնի հին սրբավայրերից մինը ու միկադօյի նախկին մայրաքաղաքը:

Եւրոպայի միապետներից ոչ մէկի հարստութիւնը չունի այն հնութիւնը, ինչ որ միկադօյինն է:

Նա իր նախորդների ծագումը անընդհատ գծով հասցնում է մինչեւ աստուածները. նրա անմիջական նախամայրը Ամատերասունն է, արեւի աստուածուհին, որ ինքն էլ ծնւած է Ճապոնի արարիչ Իզանագիի ձախ աչքից:

Միկադօների, ինչպէս եւ ընդհանրապէս Ճապոնի վաւերական պատմութիւնը սկսում է հինգերորդ դարից Քրիստոսից յետոյ:

Սկզբներում միկադօն էլի բաւական մատչելի է եղած ժողովրդին. բայց ժամանակի ընթացքում քիչ-քիչ շրջապատել է իրան փառահեղութեամբն ու ծէսերով, եւ քաշել է բոլոր աշխարհական գործերից: Հազիւ էր պատահում, որ ժողովրդին երեւար եւ այն ժամանակ ամենքն ընկնում էին գետին երեսնիվայր, չը համարձակելով աչք ձգել նրա աստածային երեսին:

«Մեր կայսրները,— ասում է ճապոնացի մի պատմագիր,— անցնում էին իրանց կեանքը ծածկոյթի ետեւ. նրանց ոտքը երբէք հողին չէր դիպչում: Դրսի ոչ մի ձայն չէր հասնում նրանց ականջին ու չէր վրդովում նրանց հանգիստը»:

Միկադօյի այդպիսի առանձնացման շնորհիւ սկսեց ուժեղանալ դայմիօսների ազդեցութիւնը. այդպէս էին կոչւում Ճապոնի աւատական իշխանները, որոնք բացարձակ անկախութեամբ կառավարում էին միկադօյից աւատ ստացած